

# Kongres Ketua Pentadbir Hal Ehwal Islam Bincang Isu Kontemporari Ummah

Pekan, 21 Januari- Permufakatan antara Universiti Malaysia Pahang (UMP) bersama pihak berkepentingan seperti Majlis Ugama Islam & Adat Resam Melayu Pahang (MUIP), Jabatan Mufti Negeri Pahang, Jabatan Agama Islam Pahang (JAIP) dan Majlis Hal Ehwal Islam Institusi Pengajian Tinggi Malaysia membolehkan edisi sulung Kongres anjuran Pusat Islam dan Pembangunan Insan (PIMPIN) berjalan lancar.

Program yang berlangsung selama dua hari ini dirasmikan Exco Dakwah Islamiah Dan Tugas2 Khas merangkap ADUN Kerdau, Dato' Syed Ibrahim Syed Ahmad sementara Naib Canselor UMP, Profesor Dato' Dr. Daing Nasir Ibrahim hadir menyempurnakan majlis penutup yang berlangsung di Dewan Senat Kompleks Pentadbiran Utama UMP Pekan baru-baru ini.

Semasa menyampaikan ucapan, Profesor Dato' Dr. Daing Nasir berkata, komposisi penyertaan kongres yang meliputi para ketua pentadbir dan lain-lain pegawai yang bertanggungjawab terhadap urusan hal ehwal Islam daripada institusi pendidikan tinggi awam dan swasta yang beroperasi di negeri Pahang menyediakan platform pewacanaan minda yang ampuh dalam mendukung aspirasi dan semangat penganjuran persidangan ini.

"Tidak sekadar itu, penyertaan wakil-wakil agensi kerajaan, pertubuhan serta badan bukan kerajaan yang berkaitan dengan urusan dasar, pentadbiran dan dakwah Islamiah turut membuka perspektif yang lebih lebar dalam konteks diskusi dan pertimbang telitian isu secara multidimensional sepanjang kongres ini berlangsung," katanya.



Beliau percaya bahawa ruang masa sepanjang kongres ini telah dimanfaatkan sebijaksananya dengan mengutamakan isu-isu kontemporari ummah yang memerlukan perhatian strategik para pentadbir hal ehwal Islam di kampus. Ini termasuklah penularan ajaran songsang yang menyesatkan aqidah, ancaman militan, gejala sosial, Islamophobia dan pertembungan gelombang pemikiran dalam pentafsiran agama.

Malahan sebagai hasil daripada pewacanaan isu-isu kontemporari ummah tersebut, maka kerangka strategik pengurusan dan pentadbiran hal ehwal Islam dapat diwujudkan di setiap Institusi Pendidikan Tinggi bagi manfaat dan rujukan warga kampus yang berkenaan secara lestari.

Kata Dato' Dr. Daing, keupayaan bertindak secara strategik ini adalah pemangkin transformasi urustadbir hal ehwal Islam di kampus-kampus institusi pendidikan tinggi yang membolehkannya beroperasi di luar konteks rutin, iaitu tidak terhad kepada mengurus masjid semata-mata.

Justeru katanya, cabaran utama yang perlu ditangani dalam kalangan pentadbir hal ehwal Islam di kampus ialah untuk membentuk budaya kerja cemerlang yang berasaskan nilai, berfokuskan strategi dan berpandukan prestasi dalam kalangan pengoperasi sistem tersebut berpaksikan pemikiran transformasional yang kreatif dan inovatif.



Sementara itu, Pengarah PIMPIN, Dr. Mahyuddin Ismail berkata, antara objektif yang ingin dicapai bagi tahun ini ialah memperkasa dan memperluaskan peranan Pusat Tadbir Hal Ehwal Islam IPT/IPTS sebagai pusat ilmu, pusat dakwah, pusat riadah dan pusat khidmat.

Selain itu pertemuan ini juga membincangkan dan menyelesaikan masalah isu semasa berkaitan Islam di IPT khususnya di Pahang serta menyatukan buah fikiran dan idea pimpinan dan pegawai Pusat Islam IPTA/IPTS.

Program yang bermakna ini turut dihadiri Mufti Kerajaan Negeri Pahang, Dato' Sri Dr. Haji Abdul Rahman Haji Osman, Pengarah Lembaga Tabung Haji Negeri Pahang, Dato' Haji Mohammad Mokhzani Mukhtar, Pengurus Besar Kanan Pusat Kutipan Zakat Pahang, dan Dato' Haji Halidan Md Daud, Dipertua Yayasan Dakwah Islamiah Malaysia, Dr. Yusri Mohamad

**Disediakan Unit Perhubungan Awam, Bahagian Komunikasi Korporat PNC**

Posted By : SITI SARAH BINTI MOHAMAD RAJIMI Date Posted : 25-01-2016, 09:16:55